

ƉWÀ' RNÈSÌ 108

Wèr be so njobè' Nyù yu wèr wowèe

- ¹ Oo Nyù, ya ntee yi yu njep wè!
M be yòp ku'si wè nè ya ntee wεεwε.
- ² M be yèesi rluη ba ntakup!
M be lε' à mɯ jìpjìp nèsi wè!
- ³ Oo Yawè, m be yònshi wè àmù bèe;
m be yòp yεε rnèsi nè wè kùntombi nè bto'.
- ⁴ Lo rkònni li raa à ba' mbe làlàa buu;
yò mini à raa a ba' mbe mù mmbà'.
- ⁵ Oo Nyù, tε bèe a nàa lo rlii mbekì caa mbe làlàa buu,
tε yo fòo yi ruu mbe tunshè bii!
- ⁶ Bèesi wèr, ja' wèr à yo nger
tε bèe ce wè kòn a bo lùη!
- ⁷ Nyù à làa embe Yě ndàp enê,
“M be gápshi ηgǒη Shekèm nè rlu'shì—ηwè,
kèr gápshi ntòn e à ηgǒη Sokòt.
- ⁸ Ɖgǒη Giled a ya; ηgǒη Mánasè à ba ya,
ηgǒη Efrèm à ba la rtaa bìr,
ηgǒη Judà à ba yà mbàn kɯɯ.
- ⁹ Ɖgǒη Muap yu ya yuu ce mε ke sù'si buu njoo;
ma' ya laba' mbendù ηgǒη Edòm;
tondèe enε mè so ηgǒη Fìlishà.”
- ¹⁰ Ɖwè ce e be dù nè mè à rla' ce a boo ηka' a sir àgho a nda?
Ɖwè ce e be cànsi mè dù àgho à ηgǒη Edòm a nda?
- ¹¹ Oo Nyù, mbò wè ma' wèr a?
Oo Nyù, wè ker bii dù wèe wer bsoogè wèe ka'.
- ¹² Ôo, jà' wèr efa yèr ηwè bbàa,
njobè' rjà' ce li lò ba ese ηwè yu cicì.
- ¹³ Wèr be so njobè' Nyù yu wèr wowèe;
a ye ce e be nyènshi yer ηgǎa bbàa.

ƆWÀ' RNÈSÌ 112

Yuu yi be kè cì' ñwè ce e yu kùyee ka'

¹ Nèsi Yawè!

Mmbõntu mi yu nè ñwè ce e ke wep Yawè,
ce yu' rbòñ nè yuu ce Yawè à làa sê.

² Yì ñgù be t̃ur ñger mbe ñgòñ,
Nyù be ghòni ñgù ñwè ce e yu kùyee.

³ Yì ndap be kù' à buu,
e be ba kùyee à nfè' wεεwε.

⁴ Rraa li ke raa à t̃u'ñji nè ñwè ce e yu kùyee,
e ke t̃ur ntee bònboñ ce koosi mnse nè bèe, a ker ba kùyee.

⁵ Ɔwè ce e yu mmo mntoo a ce fòosi buu nè bèe be yu' rbòñ,
yu ñwè ce e ke gèe yì buu kùyee.

⁶ Yuu yi be kè cì' ñwè ce e yu kùyee ka',
a be ce kuushi ye à nfè' wεεwε.

⁷ E ke wep à ryu' nsuñ mbembep ka',
yi ntee yi ke ba tatap, e ce fa bfee nè Yawè.

⁸ Yì ntee yi be bu' ka', e be wep yuu ka',
caar ye àmbò a so yi ñgãa bbàa.

⁹ E gáp buu àwàa, e fa buu nè ñgãa fùp,
e t̃ur ntee bònboñ à nfè' wεεwε,
e be t̃ur ñger t̃e a naa ye mbekì.

¹⁰ Ɔwě mbembep e ye wa'a, ntee yi ko' ye enjoo,
e k̃ur mnsòñ, bu.

Yuu ce ñwě mbembep ce kòn yi be bu à cici!

ƉWÀ' RNÈSÌ 113

Ɖwè ce e yu àmbò Yawɛ' ce E yu yisèe Nyù a nda?

¹ Nèsi nè Yawè!

Oo ngăa mfà' Yawè, nèsi nè Ye,
nèsi nè rlii Yawè!

² Nèsi nè rlii Yawè,
kɛ' e sè'ni du kùntombi ker ba à nfè' wɛɛwɛ.

³ Yi yu enɛ wèe nesi Yawè,
kɛ' embe nfè' ce nyù à bàp du ba' mbe nfè' ce e coo.

⁴ Yawè yu mbe bùu a ce sa' bto' wɛɛwɛ,
Yi fòo yi ko' a caa mbe làlàabuu.

⁵ Ɖwè ce e yu àmbò Yawè ce e yu yisèe Nyù,
ce e cu mbe bùu a nda,

⁶ a ce fyɛ' rbuu ba nshe a nda?

⁷ E ke fɔr ngàa fùp efa fùp,
fɔr mbuuyuu wèe embà ngòŋ,

⁸ gee wowèe a ba à bɛɛ bgòrgòr,
bɛɛ bgòrgòr efa mù yì bɛɛ,

⁹ E ke gèe enɛ njeŋwè ce e yu kar tɔr ndap yì,
gee ye e ce lu'shi à ma boo.

Nèsi nè Yawè

ƉWÀ' RNÈSÌ 116

Mè kòn Yawè

- ¹ Mè kòn Yawè njobè' E yu' yà njèndòn,
a yu' la rwar ce m ce war enɛ E koosi mnse nè mè.
- ² À ka' ba njobè' E m ta tù' nè mè,
banɛ m be kɛ' Li rlii tètè àmbò mè bii ntèe.
- ³ Rkwe li m lip mè àmbò taa wa'a,
rwɛp efa rkwe li m koo mè,
mè yɛ mlù a ce seɲ buu.
- ⁴ Awe, mè kɛ' rlii Yawè enê,
“Oo Yawè, kee wè jà' mè!”
- ⁵ Yawè tur ntee bònɲon, a ba kùyɛɛ,
yisèe Nyù yu Nyù ñkoosimnse.
- ⁶ Yawè ke tɛ'shi bèe ce àde' a tɛ'shì yap tu ka',
mè m ba à mlù E ja' mè.
- ⁷ Oo la ryòn, kèr lushí,
njobè' Yawè à gèe bònɲon nè wè.
- ⁸ Yi yu wa'a njobè' wè fɛr la ryòn efa rkwe,
a siɲsi ma mɲgoommir,
a ke'ni ma mɲkùu fà dì' m kote ka'.
- ⁹ M be jèr àmbò Yawè ce kòn,
àmbo m ce cu njep ñgòn na.
- ¹⁰ Ka' mè m làa enê, “Mlù mi yu nè mè sê” wa'a,
a ku byemi nè Yawè.
- ¹¹ Mè m ce wɛp, a laa enê,
“Ɖwè wɛɛwɛ yu ñwè mnde'.”
- ¹² Yuu ce àde' m fa nè Yawè
àtu buu bbònɲon wɛɛwɛ ce E gèe nè mè a kɛ?
- ¹³ M be fa rfa nè mrù' njo Yawè à gèe mè lûɲ,
kɛ' à Li rlii.
- ¹⁴ M be ruusi ma mɲkà'ni nè Yawè,
à bsii Yi bèe wɛɛwɛ.
- ¹⁵ Yawè e ke yɛ rkwe bèe
ce a yu Yi bèe à lulu.

¹⁶ Oo Yawè, a mè yò ηwè rfà'.

A mè yò ηwè rfà', muu yò ηwè rfà' ce njeηwè.
Wè fyèeshi mè bshaη.

¹⁷ M be gèe taηshì ce à ryòηshì nè wè,
ke' à lo rlii.

¹⁸ M be ruusi ma mηkà'ni nè Yawè,
à bsii Yì bèe wεεwε.

¹⁹ M be ruusi mmi mbe rla' mbe di' ce ndap Nyù à tεε,
mbe wée mη, oo Jèrusalèm.

Nèsi nè Yawè!

ገጽ 117

ገጽ 117

¹ Bto' wεεwε, nεsi nε Yawε!

Bεε wεεwε, kù'si nε Ye!

² Kù'si nε Ye njobè' Li rkòḡnì ce nfesè ce E tur nε sèe li yu rgòr,
mini Yawε à ba nfesè.

Nεsi nε Yawε!

DWÀ' RNÈSÌ 118

Li rkòḡnì ce nfesè li yu à nfè' wεεwε

- ¹ Ôo, yòḡshi nè Yawè, ḡjobè' e bòn,
Li rkòḡnì ce nfesè li yu à nfè' wεεwε!
- ² Bèe Isrèl, làa nè enê,
“Li rkòḡnì ce nfesè li yu à nfè' wεεwε.”
- ³ Mbùundap Èròn, làa nè enê,
“Li rkòḡnì ce nfesè li yu à nfè' wεεwε.”
- ⁴ Bèe ce a ce wεp Yawè, làa nè enê,
“Li rkòḡnì ce nfesè li yu à nfè' wεεwε.”
- ⁵ Mlù mi m ba nè mè, mè war nè Yawè,
Yawè à beesì mè, a fūr mè enjoo.
- ⁶ Yawè yu wèr Ye, m be wεp yuu mo' ka'.
Yuu ce àde' ḡwè gee nè mè a kε?
- ⁷ Yawè yu wèr ye, à ba Ye yà ḡwè rjà'.
M be fyε' ye àmbò a so ya ḡgãa bbàa.
- ⁸ Yi yu àndèe à rsùrnì ḡjeptii Yawè
nè ce enε à fa bfee nè ḡwè.
- ⁹ Yi yu àndèe à rsùrnì ḡjeptii Yawè,
nè ce enε à fa bfee nè boo mnlìi.
- ¹⁰ Bto' wεεwε vi m sir mè,
mè bepsì wowèe à rlii Yawè.
- ¹¹ Wowèe a m sir mè, a sir a tarte,
mè bepsì wowèe à rlii Yawè.
- ¹² Wowèe a m bòo mè àmbò nyuu wa'a,
a kweḡger àmbò mor ce yi koti à mnsini wa'a,
mè bepsì wowèe à rlii Yawè.
- ¹³ Wowèe a m dòo mè à ḡger, mè ce seni gwè,
geewa'a, Yawè à ja' mè.
- ¹⁴ Yawè yu ya ḡger, a ba ya yεε,
a Ye ce E jà' mè.
- ¹⁵ A ce yòp byεε rso nè rlu'shì—ḡwè à mndap bèe ce a yu kùyεε,
ḡger Nyù yi ke vù nè rso.
- ¹⁶ Yawè e ke nàa ḡwè mbekì à Yi ḡger,

nger Yawè yi ke vù nè rso.

¹⁷ M be kwe ka', m be cu ntèe,
te m bo suŋ buu ce Yawè à gèe.

¹⁸ Yawè à nàshi mè tatap sê,
geewa'a, a ke' ma'shi enɛ m kwe ka'.

¹⁹ Mù' nè mè cùu ŋka' embe ndàp Nyù,
te m bo niŋ njĩ mboo,
yòŋshi Yawè.

²⁰ Cena a cùu ŋka' ce yi ce dù fa Yawè,
bèe ce a yu kùyeɛ a be niŋ njĩ mboo.

²¹ M ce yòŋshi wè njobè' wè bèesi mè,
a gee mè sô.

²² Lùr ce ŋgã mboo mndap a m mà'
a kùti ba lùr rbuundap.

²³ Cena à gèe Yawè,
à ba yuu bèe à mer mmir.

²⁴ Cena a nòŋ ce Yawè à gèe,
banɛ sèe lu'shi ker yu' rbòn àgho.

²⁵ Oo Yawè, wèr ce loo enɛ à ja' wèr,
Oo Yawè, wèr ce loo enɛ à gee te wèr so.

²⁶ Nyù ghoni ŋwè ce e vù à rlii Yawè!
Wèr ce kù'si wè embe ndàp Yawè.

²⁷ Yawè yu Nyù,
a gee Li rraa li ce raa mbe wër ndù.
Kur nè mnyàa taŋshi nè bkù,
ko' àgho mbe dī' ntòo rfa.

²⁸ A wè yà Nyù, m be yòŋshi wè,
a wè yà Nyù, m be nèsi wè.

²⁹ Ôo, yòŋshi nè Yawè, njobè' E bòn,
Li rkòŋni ce nfesè li yu à nfè' weewe!

ገገገገገገገገ 121

La rjà' li ke vù ba ese Yawè

- ¹ Mè nàa ma mmir a fyè' mbe mntùu.
La rjà' li ke vù ba efè?
- ² La rjà' li ke vù ba ese Yawè,
ce e m boo rbuu ba tunshe.
- ³ E be mà'shi wè tɛ à sɛɛ ka',
Ye ce e ke ke' à wè be yè' ka'.
- ⁴ Yê, ηwè ce e ke kè'ni bèe Isrèl
e ke yè' ka', buumi ka'.
- ⁵ Yawè a ηwè ce e ke kè'ni wè;
Yawè a ηwè ce e ke ba àgee wè, ce tɛ'shi wè.
- ⁶ Nyù be tòo wè nèwaη ka',
tɛ ηwɛɛ^a yi gee yuu nè wè nètu' ka'.
- ⁷ Yawè be tɛ'shi wè efa yuu bebep wɛɛwɛ;
kèr tɛ'shi lo ryòη.
- ⁸ Yawè be tɛ'shi wè mbe nfè' ce à ce fuu, ba mbe nfè' ce à ce kuti,
ke' e sè'ni na du ba' àlùsimbùu.

^a121:6 Bèe mo' a m byemi yap ene ηwɛɛ yi ke ràa ncùu wa' gee byaη vi ce koo bèe, àmbò kà' ba byaη mo' jɛɛ jèɛ jɛɛ

DWÀ' RNÈSÌ 122

Sèe du mbe ndap Yawè

- ¹ Mè m lu'shi mbe nfè' ce a m làa nè mè enê,
“Sèe du mbe ndap Yawè.”
- ² Oo Jèrusalèm,
wèr à tɛɛ sè'ni mbe yo ncùu ŋka'.
- ³ Jèrusalèm a rla' ce a bà'ri
li ba àbee,
- ⁴ à ba rla' ce mntè' bèe Isrèl,
ce a ke loo nè Yawè a ke ko' mboo,
àmbò Yawè à m làa nè Isrèl,
tɛ wowèe a bo yòŋshi Ye.
- ⁵ A m tɛr bkàbàrà' mnsa' àfo,
à ba bkàbàrà' embe ndap Devìd.
- ⁶ Loo enɛ cumunyaŋ ba à rla' Jèrusalèm!
“M ce loo enɛ bèe ce a kòŋ Jèrusalèm a cu yɛɛnì!
- ⁷ Loo enɛ cumunyaŋ ba fa wěe mlà',
tɛ Yawè tɛ'shi wèe à wee mndap.”
- ⁸ À ka' ba njo' bɸur wa ba bkar wa,
m be làa enê, “Cumunyaŋ ba nè wèe!”
- ⁹ À ka' ba njo' ndap Yawè ce e yu yisèe Nyù ,
m be kòŋ enɛ buu ba yɛɛnì nè wèe.

ገጽ 127

Yawè a ስጋ ርዕሰ ገጽ

¹ Yawè ka' te bà'ri ndap ka',
banε bèe ce a ce bà'ri a fà' ba à cici.

Yawè ka' te kè'ni rla' ka',
banε ስጋ ገጽ kè'ni ce kè'ni à cici.

² À rnyεε à mu ስጋ ገጽ ce fà' caar kuti mbe ndàp njep nfè' ka'
te à bo koni yuu ye à yo ስጋ ገጽ yi yu à cici.

Yi yu wa'a njobè' Yawè a ስጋ ርዕሰ ገጽ fa buu nè bèe ce E kòn.

³ Yê, Yawè a ስጋ ርዕሰ ገጽ fa bèe boo,
boo à ba ስጋ ገጽ ce mini.

⁴ Boo ce ስጋ ርዕሰ ገጽ à bi à muu nsùnsù,
a yu àmbò mnjεε mbà bo ስጋ ርዕሰ ገጽ mà' bìr wa'a.

⁵ Mmbõገtu mi yu nè ስጋ ርዕሰ ገጽ
ce yi te' mnjεε yi ruu nè mnjεε anà!

Be ba mbe nfè' ce e ce rè a yi ስጋ ገጽ bbàa wèe mbe cūu ስጋ ገጽ nà,
te wowèe a coosi ye ka'.

DWÀ' RNÈSÌ 130

La ryòn li ce kè' Yawè

¹ Oo Yawè, mè war nè wè,
njobè' mè yu à mlù sê.

² Oo Tatâ, yu' yà njèndon!
Ta tù' yu' yà njèndon,
ce m ce loo wè ene à koosi mnse nè mè!

³ Oo Yawè, ka' ba ene à ce bè' buu bbebep bèe,
oo Tatâ, nwè ce àde' e sorti a nda?

⁴ Geewa'a, wε ke fòosi buu bbebep bèe,
te a bo wεp wè.

⁵ M ce kè' Yawè,
a ce kè' Ye nè ya ntee—nwè,
a ce ke' yu ce E làa.

⁶ La ryòn li ce kè' Tatâ,
caa àmbò ngăa rcin a ke ce kè' ene tù' raa,
caa àmbò ngăa rcin a ke ce kè' ene tù' raa.

⁷ Oo Isrèl, fa nè bfee nè Yawè!
Fa nè bfee nè Ye njobè' Li rkònni li yu nfesè,
E ke kòn à rjà' wèe sê.

⁸ E be jà' Isrèl,
efa yì buu bbebep wεwε.

ƆWÀ' RNÈSI 139

Oo Nyù, fyε' mè riŋ ya ntee

- ¹ Oo Yawè, wè fyε' mè,
a riŋ mè.
- ² Wè riŋ nfè' ce mε ke cuu à nshè, a riŋ nfè' ce mε ke nàti mbekì.
Mε bii ka' kwà'shi yuu, wè ba nè riŋ wεε.
- ³ Mε bii ka' kwà'shi à rjèr kèr kwà'shi à rnòŋ, wè ba nè riŋ wεε.
Wè riŋ la rjèr wεεwε.
- ⁴ Oo Yawè, tε m ka' mù' cùu enε m ce làa yuu,
wè ba nè riŋ yi wεεwε.
- ⁵ Wε ke kènŋte mè e mbenjì ba e kùntombì,
a la' yo bo mbe mǎ ndùu.
- ⁶ Njèè rrìŋ buu anà yi càa ya ŋger,
li yu rgòr ce àde' m riŋ ka'.
- ⁷ M ka' lo efa gee wè m du ba fε?
M ka' caŋ efa wo bsii m du ba fε?
- ⁸ M ka' ko' mbe bùu, à ku ba mboo!
M ka' noŋ mbà yìr, à ku ba mbǎ!
- ⁹ M ka' fεŋ du kùmbùunti,
du cu nje ntee rdip rgòr,
- ¹⁰ ka' àfo, à be càŋsi mè nè yo bo,
kèr ghashi mè nè yo bo mà'.
- ¹¹ M ka' laa enê, “Tù'nji be cete mè,
tε rraa efa mǎ geŋ li kuti à nètù”,
- ¹² ka' tù'nji be sii nè wè ka',
nètù' yi be ce raa àmbò nèwaŋ,
njobè' tù'nji ku ba nè wè àmbò rraa wa'a.
- ¹³ Wè m gèe wa bdi' nyor enjep mɔ,
a cù'shi vi njep rbù yà ma àbee.
- ¹⁴ M ce nèsi wè njobè' wè m boo mè à nji ce ŋwè wεp kèr bèε.
Mo mfà' mi yu mǐ mmbèε,
mè riŋ wa'a yεenì sê.
- ¹⁵ Bvup mo' enje mǎ nyòr vi m sùrni
mbe nfè' ce wè m ce boo mè à bsùti ka'.

Wè m lòn nfè' a yuŋte mè nje rbù yà mâ.

¹⁶ Mo mmir mi m ye mè mbe nfè' ce a m ku koo la rbù koo.

Wè m saŋ wa mnòŋ

ce wè m lè ene m be cu wεεwe mbe wě ŋwà',

te vi ka' kè' ce ba.

¹⁷ Oo Nyù, mo mŋkwà'shì mi bòn sê!

A ka' tarshi mi wεεwe mi ba gòr àmbò kè!

¹⁸ Mè ka' ba ce be' mi,

mi ba càa nsaruŋ.

Mě lè', ku bii wèe sò.

¹⁹ Oo Nyù, ce wè ba sési bée bbebepe!

Oo ŋgãa nyushi bée, lè'si nè nyor efa mě geŋ!

²⁰ Wowèe a ce làa àmbò wè nè ntee sii.

Yo ŋgãa bbàa a lòn lo rlii à cici.

²¹ Oo Yawè, mbò mè bàa bée ce a bàa wè a?

Mbò mè jàasi bée ce a ce rè wè a?

²² Mè bàa wowèe a tɛ' kɛkɛŋ,

a be' wowèe à ya ŋgãa bbàa.

²³ Oo Nyù, fyɛ' mè, ye ya ntee!

Taase mè, riŋ ma mŋkwà'shi.

²⁴ Fyɛ' ene yuu bebepe mo' yi yu njep mè lɛ,

caŋsi mè njep nduunji ce yi yu nfesè.

ƆWÀ' RNÈSÌ 145

Yawè yu ngòr

- ¹ Yà Nyù ba yà ƚkɔɔ, m be nàa wè mbekì,
kèr nèsì lo rlii à nfesè ba nfesè.
 - ² M be kù'si wè à mnòŋ wɛɛwɛ,
nèsì lo rlii à nfesè ba nfesè.
 - ³ Yawè yu ngòr, a ghɛɛte enɛ a nesi Ye sê,
àde' a fe' Vi bkù' ka'.
 - ⁴ Ɔgù bèe mò' be vuse mo mfa' nè ngù mò',
kèr suŋ ku' buu ce wè gèe.
 - ⁵ M be kwà'shi àmbò rbòŋ ce li yu njep fòo efa yo kɔɔ,
kèr kwà'shi àmbò mo mfã' mmbèe.
 - ⁶ Bèe a be suŋ àmbò nger efa mo mfã' mmbèe,
te m suŋ ya ba àmbò wo bkù'.
 - ⁷ Bèe a be yòp àmbò yo ngěe bònboŋ ce yi yu gòr,
kèr yòp mbekì àmbò à yu kùyɛɛ.
 - ⁸ Yawè yu ƚwè mmbòŋntee, a ba ƚwè ƚkoosimnse,
a ba wèni à rshentee, a ruu nè rkòŋni ce nfesè.
 - ⁹ Yawè à bòn nè ƚwè wɛɛwɛ,
Yi ƚkoosimnse à ba mbendù yuu wɛɛwɛ ce E m gèe.
 - ¹⁰ Oo Yawè, buu wɛɛwɛ ce wè m gèe vi be yònshi wè,
te yò bèe wɛɛwɛ a nesi wè.
 - ¹¹ Wowèe a be suŋ àmbò fòo ce yi yu mbe wě di' kɔɔ,
suŋ àmbò yo nger,
 - ¹² te bèe a bo rìŋ mo mfã' mmbèe,
ba rbòŋ ce li yu njep fòo efa yo kɔɔ.
 - ¹³ Yo di' kɔɔ yu di' kɔɔ ce nfesè,
wè tur nger mbendù buu wɛɛwɛ à nfesè.
- Yawè e ke làa yuu tɛɛ njoo,
a tur ntee bònboŋ à buu wɛɛwɛ ce E ke gèe.
- ¹⁴ Yawè e ke ghashi bèe ce a ce gwè,
naa bèe ce buu à yi'shi wowèe.
 - ¹⁵ Mmir bèe wɛɛwɛ mi ke fyɛ' mbendù wè,

à ce fa wowèe wap byee njep nfè'.

¹⁶ Wε ke mù' yo bo,
fa buu btèe wεεwε buu ce a ce kòn.

¹⁷ Yawè yu kùyεε à buu wεεwε ce E ke gèe,
a tɔr ntee bòḅboḅ à buu wεεwε ce E ke gèe.

¹⁸ Yawè yu àtɔtɔ nè bèe wεεwε ce a ke kε' Ye,
nè bèe wεεwε ce a ke kε' Ye nè mini—ḅwè.

¹⁹ E ke gèe yuu ce bèe ce a ce wεp Ye a kòn,
ker yu' lap rwar, ja' wowèe.

²⁰ Yawè e ke kè'ni ḅwè wεεwε ce e kòn Ye,
geewa'a E be yushi bēe bbeber wεεwε.

²¹ Ya cùu yi be nèsi Yawè,
te buu btèe wεεwε vi nesi Li rlii ce li yu rrara à nfesè ba nfesè.

ገገገገገገ 119

Wo blàa vi yu àmbò rraa nè ma mḡkùu wa'a

Alèf

- ¹ Mmböḡtu mi yu nè bèe ce yap ḡgèe yi yu kùyee,
à ba bèe ce a ce jèr àmbò ncir Yawè yi ce làa.
- ² Mmböḡtu mi yu nè bèe ce a yu'ni nè Vi mncir,
à ba bèe ce a ce ròo ye nè yap ntee—ḡwè.
- ³ Wowèe a ke gèe yu bebep ka' foḡ,
ku ce jèr ba àmbò Yawè ce làa.
- ⁴ Yawè, wè fa wo mncir ene
a le vi yeeni.
- ⁵ M ce kòḡ à rce yu'ni
nè wo mncir à nfè' wèewè,
- ⁶ M ka' le mmir mbendùu wo mncir,
banè ritu yi be koo mè ka'.
- ⁷ M be nèsi wè nè ntee rara,
mbe nfè' ce mè ye'ni wo mncir ce vi yu kùyee.
- ⁸ M be lè wo mncir,
fa mà'shi mè dùdù ka'.

Bèt

Yu'ni nè mncir Yawè

- ⁹ Àde' muu nsùnsù cu rcu rrara à njèe ke?
Àde' e cu à njèe njì ce e ce yu'ni nè wo blàa.
- ¹⁰ M ce ròo wè nè ya ntee—ḡwè,
fa mà'shi tē m lè'ti enje wo mncir ka',
- ¹¹ Mè lèe wo blàa njep mē ntee,
fà di' m bo gèe yuu bebep nè wè ka'.
- ¹² Oo Yawè, m ce nèsi wè,
ye'ni mè wo mncir.
- ¹³ M be suḡ bèe wo mncir
ce wè fa wèewè.
- ¹⁴ M ce lu'shi à ryu'ni nè wo mncir
caa àmbò m ce lu'shi nè ku' buu ce mè tur.

¹⁵ M be ce kwà'shi àmbò wo mncir
ce jèr àmbò wè ce kòn enè m jêr.

¹⁶ M be lu'shi à wo mncir,
kè' lèsi wo blàa ka'.

Gemèl

Rbòn ce li yu njep mncir Yawè

¹⁷ Gèe bònbon nè mè ce yò ñwè rfà',
te m bo cu, ce yu'ni nè wo blàa.

¹⁸ Mù' ma mmir te m bo ye
buu bbèe ce vi yu njep yo ncir.

¹⁹ M yu ñkèe mbe tunshè,
fa sùrti wo mncir ese mè ka'.

²⁰ Ya ntee yi ce lùute
à rriñ wo mncir à nfè' wèewè.

²¹ Wè ke lapni ñgãa nàa nyor ce ndòo à co' wowèe,
à ba bèe ce a lè'ti efa wo mncir.

²² Fa mà'shi te wowèe a ce cep mè kèr ce vùshi mè ka',
njobè' mè yu'ni nè wo mncir.

²³ Ka' boo mnlii a cu mncù nè mè wa'a,
yò ñwè rfà' be kù ce kwà'shi àmbò wo mncir.

²⁴ M ce lu'shi nè wo mncir,
vi ke cep mè.

Dalèt

Fa ntee à ryu'ni nè mncir Yawè

²⁵ Mè tæe yĩ ñkwe,
kusi la ryòn àmbò wè làa!

²⁶ À m ba mbe nfè' ce mè m suñ wè àmbò ya ñgèe, wè beesì mè.
Ye'ni mè wo mncir!

²⁷ Jà' mè te m riñ yuu ce wo mncir vi ce làa,
te m bo ce kwà'shi àmbò mo mmfà' ce mghagha'.

²⁸ Mlù mi ce sèesi mè,
fa mè ñger àmbò wè làa!

²⁹ Fèesi mè efa ñgèe mmbo'ni,
tur ntee bònbon nè mè, ye'ni mè wo mncir.

³⁰ Mè ce à rba mini,

mè fa bfee nje wo mncir.

³¹ Oo Yawè, mè ghashi wo mncir,
fa mà'shi te ritu yi koo mè ka'.

³² M be ce yu'ni nè wo mncir,
njobè' à be gèe te m riŋ vi.

Hê

Rloo enɛ Yawè ja' ŋwè te e riŋ Vi mncir

³³ Oo Yawè, ye'ni mè yuu ce wo mncir vi ce làa,
te m le vi dù bà' àlùsimbùu.

³⁴ Gèe te m riŋ yuu ce wo mncir vi ce làa,
te m bo lè vi ce yu'ni àgho nè ya ntee—ŋwè.

³⁵ Càŋsi mè te m jɛr àmbò wo mncir vi ce làa,
njobè' vi gèe m ce lu'shi.

³⁶ Gèe te m le ntee njep wo mncir,
ke' ba njep se' cici ka'.

³⁷ Fa mà'shi te m fa bfee njep buu bcici ka',
gèe te m cu ntèe àmbò wè làa.

³⁸ Ruusi mo mŋkà'ni nè mǎ yò ŋwè rfà',
te a bo wɛp wè.

³⁹ Cà'si mncɛp ce m ce wɛp embe mǎ ndùu,
njobè' wo mncir vi bòŋ.

⁴⁰ Yê, mè shee wo mncir,
fa mè ryõŋ rfi njobè' à yu nrara.

Vâv

Fa nè bfee nè ncir Yawè

⁴¹ Oo Yawè, dùŋshi mè lo rkòŋni ce nfesè,
ja' mè àmbò wè ka'ni nà,

⁴² te m bo tur yuu ce m be bèesi ŋwè ce e ce cɛp mè,
njobè' mè fa bfee nè wo blàa.

⁴³ Fa fɛr làa ce mini eku mǎ cùu wàwà ka',
njobè' mè fa bfee njep wo mncir.

⁴⁴ M be kù ce yu'ni nè wo mncir,
à nfesè ba à nfesè,

⁴⁵ ce jèr wàrwàr,
njobè' m ce ghèter à ryu'ni nè wo mncir.

- ⁴⁶ M be suŋ àmbò wo mncir kùntombì nè bkuu,
kè' koosi ritu ka',
⁴⁷ njobè' m ce yu' rbòŋ nè wo mncir
ce mè kòŋ.
⁴⁸ M be nàa ma mmbo mbekì nè buu ce wè làa ce mè kòŋ,
ce kwà'shi àmbò wo mncir.

Sàyîn

Byemi nè ncir Yawè.

- ⁴⁹ Kuushi yuu ce wè m làa nè yò ŋwè rfà'.
Làa anà yi fa mè rkwà'shĩ rbòŋboŋ.
⁵⁰ Yuu ce yi ce bòose mè à ma mlù yi yu ene
mo mŋkà'ni mi gèe mè ba ntèe.
⁵¹ Dgãa nàanyor a vùshi mè ke' ce borni ka',
geewa'a, mè ke' borni efa ryu'ni nè wo mncir ka'.
⁵² Oo Yawè, mɛ ce kwà'shi àmbò wo mncir ce vi m ba elũuŋòŋ,
vi ce bòose mè.
⁵³ Ntee yi ke ko' mè enjoo se njobè',
bëe bbebep ce a tètetu nè wo mncir.
⁵⁴ Mɛ ke yòp wo mncir à byɛɛ,
a bdi' wɛɛwɛ ce mɛ ke cu.
⁵⁵ Oo Yawè, mɛ ke kuushi lo rlii nètà'
ce lè wo mncir.
⁵⁶ Yuu ce m ce yu' rbòŋ àgho yi yu ene
m ce lè wo mncir.

Hêt

Fa ntee nje mncir Yawè

- ⁵⁷ Oo Yawè, à yu yà,
mè kà'ni à ryu'ni nè wo blàa.
⁵⁸ Mè loo mo mmbòŋntee nè ya ntee—ŋwè,
koosi mnse nè mè àmbò wè m kà'ni.
⁵⁹ Mɛ kwà'shi àmbò ya ŋgèe yi yu,
beŋger ce jèr ba àmbò wo mncir vi ce làa.
⁶⁰ M be cèɛcɛ à rlè wo mncir ka',
càasi nfè' ka'.
⁶¹ Ka' bëe bbebep a lè'shi btaa nè mè wa'a,

mè lèse wo mncir ka'.

⁶² Mɛ lɛ' nè nteetɔ' ku'si wɛ,
àtu wo mncir ce vi yu kùyɛɛ.

⁶³ M yu ŋkar nè ŋwɛ wɛɛwɛ ce e ce wɛp wɛ,
a ce lè wo mncir.

⁶⁴ Oo Yawè, wè kòn bèe wɛɛwɛ embe tunshè.
Yɛ'ni mè wo mncir!

Têt

Mncir Yawè vi yu à lulu sê

⁶⁵ Oo Yawè, wè gèe bònboŋ nè yò ŋwè rfà',
àmbò wè m làa.

⁶⁶ Yɛ'ni mè à rkwa'shi yuu bònboŋ ker fa mè bfee,
njobè' mè byemi nè wo mncir.

⁶⁷ Mè m ce dà' tɛ mlù mi ka' vù nè mè,
geewa'a, m ce yu'ni nè wo blàa sè'ni.

⁶⁸ Wè bòn, a ce gèe buu bbònboŋ.
Yɛ'ni mè wo mncir.

⁶⁹ Dgãa nàanyor a ce yo' mè nè mnde',
geewa'a, m ce lè wo mncir nè ya ntee—ŋwè.

⁷⁰ Wowèe a tèesi mntee àmbò mnfoonyàa ce mi sèeti wa'a,
geewa'a, mɛ ke yu' rbòn nè wo mncir.

⁷¹ Yi yu yeenì enɛ mlù mi m ba nè mè,
tɛ m bo yɛ'ni wo mncir.

⁷² Wo mncir vi yu à lulu nè mè,
a caa gul ba silvà mncùkì.

Yôd

Mncir Yawè vi yu kùyɛɛ

⁷³ Wè m boo mè nè mo mmo a ke'ni mè,
fa mè bfee tɛ m bo yɛ'ni wo mncir.

⁷⁴ Bèe ce a ce wɛp wè a be yɛ mè lu'shi,
njobè' mè byemi nè wo blàa.

⁷⁵ Oo Yawè, mè riŋ mene wo mncir vi yu kùyɛɛ,
a riŋ mene wè fa mè ŋgɛ' njo à yu mini.

⁷⁶ Bòose mè nè lo rkòŋnì ce nfesè,
àmbò wè m kà'ni mè ce yò ŋwè rfà'.

⁷⁷ Koosi mnse nè mè tɛ m bo cu ntèe,
njobè' m ce yu' rbòn nè wo mncir.

⁷⁸ Gèe tɛ rìtu yi koo ngǎa nàanyor njobè' wowèe a tee mnde' mbe mǎ
tù.

À ka' ba yi àmbò mè, m be ce kwà'shi àmbò wo mncir.

⁷⁹ Mà'shi tɛ bèe ce a ce wɛp wè a vu ye mè,
tɛ wowèe a bo rìṅ buu ce wè làa enɛ wèr gèe.

⁸⁰ Mà'shi tɛ ya ntee yi ba rara kuu wo mncir,
fà di' rìtu yi bo koo mè enɛ mè lè vi ka' ka'.

Káf

Dwè ce loo enɛ Yawè ja' ye efa yi ngǎa bbàa

⁸¹ M ce kè' mɛnɛ à ja' mè,
mè byemi nè wo blàa.

⁸² Mǎ co'ni mmir à rye yuu ce wè kà'ni,
a bipshi enê, “À be bòose mè ba à se'kɛ?”

⁸³ Ka' m yu àmbò ngùpmrù' ce a kèti à njemor wa'a,
geewa'a, mè ke' lese wo mncir ka'.

⁸⁴ Mǎ yò nwè rfà', m be kè' wè bà' fɛ?
À be sa' bèe ce a ce fa ngɛ' nè mè à se'kɛ?

⁸⁵ Dgǎa nàanyor a tuṅ bbè'tè nè mè,
wowèe a ce cu àmbò wo mncir vi ce làa ka'.

⁸⁶ Wo mncir wɛwɛ vi yu mini,
wowèe a tee mnde' mbe mǎ tù, jà' mè!

⁸⁷ Wowèe a ce seni cà'si mè embe tunshè,
geewa'a, mè mà' wo mncir ka'.

⁸⁸ Mà'shi mè njo' lo rkòṅni ce nfesè,
tɛ m bo yu'ni nè yuu ce wè làa.

Lamèd

Rbyemì enjep mncir Yawè

⁸⁹ Oo Yawè, yuu ce wè làa,
yi ku ba mini mbe bùu à nfè' wɛwɛ.

⁹⁰ Yò mini ku ba àgho à nfè' wɛwɛ.

Wè m gèe tunshè, yi ku tɛɛ àmbò wè m gèe.

⁹¹ Wè m làa, buu wɛwɛ à ku ba àgho ba' ntini,
buu anà wɛwɛ vi ce fà' nè wè.

- ⁹² Mè m ba tɛ bà kòn wo mncir ka',
mè m ba kwe mbe nfè' mlù mi m ba nè mè.
- ⁹³ M be kè lèse wo mncir ka',
wè gèe mè cu ntèe njo' vi.
- ⁹⁴ A mè yò, jà' mè,
mè ghèter à ryu'ni nè wo mncir.
- ⁹⁵ Bèe bbelep a lè' mè tɛ a bo yu mè,
geewa'a, m be ce kwà'shi ba àmbò wo mncir.
- ⁹⁶ Mè ye mɛnɛ buu wɛɛwɛ ce vi yu yɛɛnì vi tɛr nfè' ce vi be kè mì
geewa'a, wo mncir vi be kè mì ka'.

Mêm

Rkòŋnì e nè mncir Yawè

- ⁹⁷ Oo njèe nji ce mè kòn wo mncir!
Mɛ ke kwà'shi àgho à nfè' wɛɛwɛ.
- ⁹⁸ Wo mncir vi ke gèe m tɛr bfee caa ya ngãa bbàa,
njo' vi ke kù ce ba njep mè.
- ⁹⁹ Mè rìŋ buu a caa ya ngãa ryɛ'ni wɛɛwɛ,
njobè' mɛ ke kwà'shi àmbò wo mncir.
- ¹⁰⁰ Mè rìŋ buu a caa bleebèe,
njobè' m ce lè wo mncir.
- ¹⁰¹ Mè kani à rgèe ngèe belep,
tɛ m bo yu'ni nè wo blàa.
- ¹⁰² Mè lɛ'ti efa wo mncir ka',
njobè' wè m ye'ni mè vi.
- ¹⁰³ Wo blàa vi lèe nè mè ba à njèe,
vi lèe a caa blù!
- ¹⁰⁴ Wo mncir vi gèe mɛ rìŋ buu,
a mbùu ce mè bàa ngèe belep wɛɛwɛ.

Nûn

Rraa ce li yu njep mncir Yawè

- ¹⁰⁵ Wo blàa vi yu àmbò lam ce e ke raa njep mɛ nduunji wa'a,
a ba rraa njep mɛ rcènji.
- ¹⁰⁶ Mè kàa enɛ,
m be lè wo mncir ce vi yu kùyɛɛ, a tɛɛ njoo.
- ¹⁰⁷ Mè ye ngɛ' sê,

- oo Yawè, gèe tɛ m cu ntèe àmbò wè làa.
- ¹⁰⁸ Oo Yawè, koo la rfa rnèsi ce m ce fa enjep mǎ ntee,
yɛ'ni mè wo mncir.
- ¹⁰⁹ Mɛ ke fa la ryòn à nɣɛ' à nfè' wɛɛwɛ,
geewa'a, mè lèse wo mncir ka'.
- ¹¹⁰ Běe bbelep a lè' taa nè mè,
geewa'a, mè fɯɯ enjep wo mncir ka'.
- ¹¹¹ Wo mncir vi yu à lulu nè mè à nfè' wɛɛwɛ,
njobè' vi gèe ya ntee yi ce lu'shi.
- ¹¹² Mè fa ya ntee à ryu'ni nè wo mncir,
nfesè, caar dù bà' àlùsimbùu.

Samèk ɔ

Mncir Yawè vi ke tɛ'shi nɣwè

- ¹¹³ Mè bàa bèe ce a tur mntee bbaa,
geewa'a, mè kòn wo mncir.
- ¹¹⁴ À yu ya di' rsùnì, a ker ba nɣwè ce e ce tɛ'shi mè.
Mè lè bfee njep yuu ce wè làa.
- ¹¹⁵ Wèe ce nɣãa nɣèe buu bbelep, nàti nè efa mǎ gen,
tɛ m bo yu'ni nè mncir yà Nyù.
- ¹¹⁶ Fa mè nɣer àmbò wè kà'ni, tɛ m bo cu ntèe.
Fa gèe tɛ m lɛ bfee enɛ à be jà' mè tɛ rìtu yi lo koo mè ka'.
- ¹¹⁷ Tomi mè fà di' yuu mo' yi bo jòo mè ka',
tɛ m bo ce fa bfee njep wo mncir à nfè' wɛɛwɛ.
- ¹¹⁸ Wɛ ke jàasi bèe wɛɛwɛ ce a lɛ'ti enje wo mncir,
njobè' wap bfee kwèe vi yu à cicì.
- ¹¹⁹ Wɛ ke mà' bɛe bbelep embe tunshè wɛɛwɛ àmbò dòti wa'a,
a mbùu ce mè kòn wo mncir.
- ¹²⁰ Mɛ ke kànɣni njobè' m ce wɛp wè,
a ce wɛp wo mncir.

Àyèn ɣ

Yu'ni nè mncir Yawè

- ¹²¹ Mè gèe yuu ce yi yu kùyɛɛ a ba yɛɛnì;
fa mà'shi mè nè bèe ce a ce nyù' mè ka'.
- ¹²² Kà'ni enɛ à be gèe bònboŋ nè mè ce yò nɣwè rfà', tɛ'shi mè;
fa mà'shi tɛ nɣãa nàanyor a nyù' mè ka'.

- 123 M ce kè' wè enɛ à be jà' mè,
ruusi mo mɲkà'ni ce mi yu kùyɛɛ.
- 124 Gèè nè yò ɲwè rfà' àmbò lo rkòɲni ce nfesè li yu,
ker ye'ni mè wo mncir.
- 125 A mè yò ɲwè rfà', fa mè bfee,
te m bo rìɲ wo mncir.
- 126 Oo Yawè, nfè' à gheɛ ce wè ba gèè yuu,
ɲjobè' a bɸ' wo mncir.
- 127 Mè kòɲ wo mncir a caa gûl,
a caa gul ce e bòn sê.
- 128 A mbùu ce mè lòr wo mncir wɛwɛ enɛ vi yu yeɛni,
a baa ɲgèè ce yi yu ɲjìjì.

Pê ɔ

Mè fa ntee à ryu'ni nè mncir Yawè

- 129 Wo mncir vi yu bghagha',
a mbùu ce m ce yu'ni àgho.
- 130 A ke nàshi wo blàa vi fa rraa,
gee bèè ce a rìɲ yuu ka', a tɸr bfee.
- 131 Mè mù' cùu a ce yòɲse àmbò ɲgwe wa'a,
ɲjobè' mè kòɲ à rriɲ wo mncir.
- 132 Bèeɲger fyɛ' mè, koosi mnse nè mè,
àmbò wɛ ke gèè nè bèè ce a kòɲ lo rlii.
- 133 Kèɲte la rjèr àmbò wè kà'ni,
fa mà'shi te yuu bebep yi tɸr ɲger mbe mǽ ndùu ka'.
- 134 Jà' mè embà mmbo bèè ce a ce nyù' mè,
te m bo yu'ni nè wo mncir.
- 135 Gèè te wo bsii vi raa mbendù mè ce yò ɲwè rfà',
ker ye'ni mè wo mncir.
- 136 M ce cù' mɲgoommir,
ɲjobè' bèè a ce yu'ni nè wo mncir ka'.

Tsadè

Mncir Yawè vi yu kùyɛɛ

- 137 Oo Yawè, wè yu kùyɛɛ,
wo mncir vi ba yeɛni.
- 138 Wè fa wo mncir njo' à yu kùyɛɛ,

- a ba mini.
- ¹³⁹ Ya ntee yi ce ko' mè enjoo,
njobè' ya ngãa bbàa a lèse wo blàa.
- ¹⁴⁰ A taase mo mḡkà'ni mi ba mini,
yò ḡwè rfà' à koḡ mmi.
- ¹⁴¹ M yu yuu ka', bèe a jaasi mè,
geewa'a, mè lesè wo mncir ka'.
- ¹⁴² À yu kùyeè à nfè' wèewè,
wo mncir vi ba mini.
- ¹⁴³ Mè yu à ḡḡè', a ba à mlù,
geewa'a, m ce lu'shi nè wo mncir.
- ¹⁴⁴ Wo mncir vi yu kùyeè à nfè' wèewè,
fa mè bfee tē m riḡ vi tē m bo cu ntèe.

Kôf

Ḋwè ce war enè Yawè ja' ye

- ¹⁴⁵ Oo Yawè, m ce war nè ya ntee—ḡwè, bèesi mè!
M be yu'ni nè wo mncir.
- ¹⁴⁶ M ce kè' wè, jà' mè,
tē m bo yu'ni nè wo mncir
- ¹⁴⁷ Mè ke lè' tē tù' ka' raa, war nè wè enè à ja' mè.
Mè lè bfee nje yuu ce wè làa.
- ¹⁴⁸ Mè ke lò ke'se nè nteetù',
tē m bo ce kwà'shi àmbò mo mḡkà'ni.
- ¹⁴⁹ Yu' yà njèndonḡ njo' lo rkòḡni ce nfesè.
Oo Yawè, gèe tē m cu ntèe njo' wè ke sa' kùyeè.
- ¹⁵⁰ Bèe ce a ce ghoo ntaḡ mbembep a vù àtutù nè mè,
wowèe a ce yu'ni nè wo mncir ka'.
- ¹⁵¹ Oo Yawè, ka' yi yu wa'a, à yu àtutù nè mè,
wo mncir wèewè vi yu mini.
- ¹⁵² Mè m riḡ yuu ce wo mncir vi làa kè' elüḡḡòḡ
enè wè m gèe vi enè vi ba nfesè.

Rêsh 7

Ḋwè ce war enè Yawè ja' ye efa yi ngãa bbàa

- ¹⁵³ Fyè' yà ḡḡè', ja' mè
njobè' mè ke lèse wo mncir ka'.

- 154 Sa' yà nsa' nè mè, ja' mè,
gee te m cu ntèe àmbò wè kà'ni!
- 155 Rjà' rli yu nè bée bbelep ka',
njobe' wowèe a ke fa bfee nè wo mncir ka'.
- 156 Oo Yawè, yò ñkoosimnse yu gòr,
gèe te m cu ntèe àmbo wo mncir vi làa.
- 157 Bèe ce a ce fa mè ñgè' ker ba bèe ce a bàa mè a yu gòr,
geewa'a, mè ke' fuu enjep wo mncir ka'.
- 158 Mè ke fye' bèe ce a byemi ka' yi ce ko'ni mè,
njobè' wowèe a ke yu'ni nè wo mncir ka'.
- 159 Ye àmbò mè kòn wo mncir,
gèe te m cu ntèe njo' lo rkòñni ce nfesè.
- 160 Wo blàa wèewè vi yu mini,
wo mncir wèewè vi yu kùyeè, a ba nfesè.

Sin ba Shîn

Fa nyor nè mncir Yawè

- 161 Bèe ce ñger yi yu nè wowèe a fa mè ñgè' à cici,
geewa'a, ya ntee yi ce kàñni njo' wo blàa.
- 162 M ce lu'shi nè wo blàa.
àmbò ñwèe ce e kwè' lulu buu efa ñkù bìr wa'a.
- 163 Mè bàa mnde', a jaasî,
geewa'a, a koñ ba wo mncir.
- 164 Mè ke nèsi wè ñkàrà' sàamba njep nòñtu',
njobè' wo mncir ce vi yu kùyeè.
- 165 Bèe ce a kòn wo mncir a ke tur cumunyañ ce e yu gòr,
àde' yuu mo' yi gee wowèe a kotè ka'.
- 166 Oo Yawè, m ce kè' mènè à ja' mè,
a ce yu'ni nè wo mncir.
- 167 Mè ke yu'ni nè wo mncir,
a koñ vi ba à sê.
- 168 Mè ke yu'ni nè wo mncir ba buu ce wè làa,
njobè' wè rìñ buu ce mè ke gèe wèewè.

M ce loo enɛ Yawè ja' mè

- ¹⁶⁹ Oo Yawè, yu' la rwar!
Gèe te m riŋ buu àmbò wè làa nà.
- ¹⁷⁰ Yu' la rloo,
ja' mè àmbò wè làa nà.
- ¹⁷¹ M be cù' yòp nèsi wè.
njobè' wɛ ke ye'ni mè wo mncir.
- ¹⁷² M be yòp àmbò wo blàa,
njobè' wo mncir vi yu kùyeɛ.
- ¹⁷³ Tami nyor à rjà' mè,
njobè' mè ce wo mncir.
- ¹⁷⁴ Oo Yawè, m ce kè' enɛ à ja' mè,
a ce lu'shi nè wo mncir.
- ¹⁷⁵ Mà'shi te m cu ntèe ce nèsi wè,
gèe te wo mncir vi ja' mè.
- ¹⁷⁶ Mè dà' àmbò njèe ce e bu wa'a,
ròò mǎ yò ɲwè rfà'
njobè' mɛ ke lèse wo mncir ka'.